

# LA CARTA DEL APOSTOL SAN PABLO A LOS EFESIOS

---

Pablo embesa Jesús quiato Efeso jenda je

**1** <sup>1</sup>Se rei Pablo. Dios que seirabo ra. Jesucristo chimbaaquiato sacua. Co ambesa mondo quia jêje aque. Jesús icuasa je. Efeso jenda je. <sup>2</sup>Sã Dios riqui uturã ndeacuquia bei jêje. Jesucristo abe no. Sã ùquĩ ndiqui jembia bei.

Cristo mbae turã saã ja nande je

<sup>3</sup>Nandechẽ turã mbei chõ nguia Dios riĩ. Jesucristo ru riĩ. Jesucristo rese chõ nandeico nguiaã ã cote. Ibatenda chõ nandeico nguiaã ã cote. Nyebe Dios riqui nguiaã mbae turã naa jate nande je co. <sup>4</sup>Dios que nandeirabo nyii ra. Cristo riĩ. Mbae ao ja nonde. Nyesecua tuchi que nanderese ra. Nyebe nandeicuã mbutiã ja nguiaã nandesì. Nandeico turã sacua enonde. <sup>5</sup>Dios que nandeirabo tuchi coose ra. Mbae ao nonde. —Jesucristo riĩ nda seriirina jê, i que nande je nandeicuã mose ra. <sup>6</sup>Nandechẽ mbei sacua Dios turã nii. Uturã je chõ nandeisi nguiaã Jesucristo riĩ. <sup>7</sup>Jesucristo miĩ ngue mano nanderirõ sacua mbae icua si ra. Ae riĩ ño Dios nandeicuã mbutiã nguiaã nande si cote. Dios turãte quia nande je re. <sup>8</sup>Dios que uturã teacuquia ja nande je ra. Nyebe eriqui nguiaã mbae icua jate nande je. <sup>9</sup>—Seriirĩ nda amondo mbia je íbii. Ae ra mbia mangue choñoa jenda mingo ja serese cote, i que Dios cose ra. Ùquĩ ngue eteacuquia nande je cote ra. Nande eicua sacua. <sup>10</sup>Dios icoquiato mose ra mbae mbuchiicuabo ja cote. Nandemunua ja ra ino Cristo nonde. Cristo ra mbae rerecua ja tuchi aque mose cote. Ibi jenda rerecua ja. Ibatenda abe rerecua ja.

<sup>11</sup>Ae Cristo saã nande je nae, ùquĩ nii ño ngue Dios nandeirabo nguiaã cose. Mbae tiã mose que Dios nandeirabo nyii ra. Ae sí mbae turã naa naa

sacuã nande je. Dios cheẽ nguire mbae riqui nyecua bei ã. <sup>12</sup>Urecheẽ turã mbei sacua Dios riĩ ño ngue ureirabo nguiã. Ure rane ngue Cristo ureicua nyii ra. <sup>13</sup>Jẽ abe que Cristo jẽicua chee cote ra. Jẽ echeẽ turã andu mose. —Cristo ra jendirõ jẽicua si, i mose jẽje. Jẽ Cristo icua mose que Espiritu Turã Cristo mbae marca miĩ jendese ra. —Espiritu Turã tamondo Cristo icuasa je, i Dios quia nyii nae, aque sí que Cristo mbae marca miĩ jendese cote ra. <sup>14</sup>Espiritu Turã ndiqui nandechiangui re co. Nyebe nandeico nguiã ñee. —Dios ra mbae mee ja nande je ucheẽ nguire, i. Dios que nandei Jesus ruqui ribishorõ nda. Nandemingo bei ra erese cote. Ûquĩ niĩ ño Espiritu Turã Cristo mbae marca miĩ nguiã nanderese. Nandechẽ turã mbei sacua Dios riĩ ño ngue ùquĩ nde.

### Sã Dios jembirandu uquirãcuã ndese, i Pablo

<sup>15</sup>Airandu que jendese ra. Jesús jẽicua tuchite quia ùquĩ. Jenyesequa tuchite equia Dios quiato ja rese ùquĩ. <sup>16</sup>Nyebe aico nguiã ñee hui ãte Dios je. Gracias, i bei ee jeniĩ. <sup>17</sup>—Paba, ndequiato embaaquiato tuchi Cristo riĩ. Cristo eicua uquia tuchi ee, ae beite se quia Dios turã je jeniĩ co. <sup>18</sup>Acheẽ mbeite quia Dios je jeniĩ co. —Paba, ae turã nda eresaã je ndequiato je nae, ùquĩ ndese embirandu jiri namo. Ae turã nda eremeje ee nae, ùquĩ ndese abe embirandu. <sup>19</sup>Ndequirãcuã ndese abe embirandu, ae beite quia Dios je jeniĩ co. Dios quirãcuã nda ua eã mbei. Equirãcuã ndiqui Jesús quiato chianguí re ja ã. <sup>20</sup>Dios quirãcuã ae que Jesús raaque mbuquera si ra. Dios quirãcuã ae que Jesús mbocoi miĩ ujii ra. <sup>21</sup>Dios que Jesús miĩ mbae rerecuarã ja ra. Ae quia rei i tuchi ererecua mo si. Gobierno mo ab e si. Ae quia rei ecuasú tuchi ibi jenda ja si. Ibatenda abe mo si. <sup>22</sup>—Mbae ja rerecua tuchi rei Jesús, i que Dios ra. —Sequiato rerecua ja chõ ae re, i que Dios ra. <sup>23</sup>Dios quiato rei Jesús rete rã. Jesús riqui uquiato chianguí re co. Manguiti eriqui eã aroneate. Mbae aosa ja chõ ae re.

### Uturã niĩ Dios aba rirõ aba icuã si

**2** <sup>1</sup>Dios que nguico mondo jẽje cote ra. Jẽicua niĩ ño ngue jẽingo nguiã eraaque rã nyii. <sup>2</sup>Mbia ataque rã tuchi que jẽingo aque mose ra. Mbae icuã naa naa ndesechi. Satanás ñee ndui beite que jẽingo nyii ra. Equirãcuãte que eriqui jẽje ra. Ae siqui ãte quia Dios rese nae, ùquĩ ño Satanás ñee mumbayã nguiã ã. <sup>3</sup>Eĩ nande que equia cose nyii ra. Ae nandebite riqui mbae icuã nyii nae, ùquĩ ndesechõ ño ngue nandeico ra. Ae rese nandeico ndua beite mbae icuã nyii nae, ùquĩ ndesechõ ño ngue nandeico nyii ra. Mbia ataque rã sí chõ ngue nandeico mbae icuã naa naa nda. Dios nda nandembasi nguiã nandeicuã niĩ ña. <sup>4</sup>Eyayãte quiato ngue eriqui rei nguiã nanderese. Nyesecua tuchite quiato que equia nanderese ra. <sup>5</sup>Eraaque raãte raque nande nandeicuã niĩ nyii. Nyebe nguico turã

mondo nguiã nande je Cristo raaque mbuquera si mose. Dios turã ae chõ jendirõ nguiã jëicuã si. <sup>6</sup>Dios Cristo raaque mbuquera mose que nande abe mbuquera echabe ra. Dios que nandemingo erese ibate cote ra. <sup>7</sup>Dios turã tuchi riqui nande je Jesucristo riĩ co. Ĩ nda mbia jirandu randu Dios chisaã turã ndese emo mose. Ibátee nandeico mose abe no. <sup>8</sup>Jë ngue Jesús jëicua ra. Nyebe que Dios jendirõ jëicuã si ra. Uturã nii ño ngue jendirõ nguiã jëicuã si. Jë ae jeñimbucha aroneate Jesús rese. Dios ae ngue jembucha nguiã erese. <sup>9</sup>Nandechisaã turã nii eã ño Dios nandembucha nguiã Jesús rese. Nyebe nandemo ndiqui uturã naa naa aroneate. <sup>10</sup>Dios ae que nandea ra. —Se emingo mose Jesucristo rese, aque mose quia ra mbae turã naa naa cote, i que Dios nanderiĩ cose ra.

### **Cristo miĩ ño mbia mingo turã turã nguiã nyiese**

<sup>11</sup>Dios rese que jëingo ãte nyii ra. Ũquĩ si jëtesareĩã ño. Judíos eã ño ngue jë ndesë. Nyebe judíos jendirirõ nguiã. Circuncisión ngue jësaã eãte judíos rã ndesë. <sup>12</sup>Jëingo eãte que Cristo rese nyii resë. Jëingo turã eãte que equia Dios rimba je resë. Dios cheë si que jëingo ishote resë. —Dios ra mbae turã saã nande je, jenyë ãte que equia ndua aque mose resë. <sup>13</sup>Jesucristo mbae chõ jë cote re. Ishote jëingo raque Dios si cose. Dios que jembucha tuchi uchiese Jesucristo mano nii nda. <sup>14</sup>Cristo miĩ ño nandemingo turã nguiã nyiese ã. Ae miĩ ño judíos mingo turã nguiã judíos eã ndese co. Ae miĩ ño judíos eã mingo turã nguiã judíos rese co no. Ũquĩ ngue siqui icuãte quia nyue Cristo icuayã mose nyii ra. Mbia miĩ na ño eriqui nguiã siqui turã nyue ã cote. <sup>15</sup>Umano mose que Jesús judíos mbui mondo Moisés cheë si cote ra. Ae Moisés ñee, judíos echeë mumba eã sacua nae, ũquĩ si que Jesús embui cote ra. Nyebe judíos siqui turã arõte judíos eã ndese ã cote. Judíos eã abe siqui turã arõte judíos rese cote. Ũquĩ siqui mose Jesús rese, co miĩ na ño eriqui nguiã ã cote. Mbia miĩ mbiãsiu ji rã ño eriqui nguiã ã cote. <sup>16</sup>Ũquĩ icuã icuã mose nyue que Cristo mano ũquĩ icuã ndiquicharõ nda. Ũquĩ mingo turã ja nonde Dios rese. Siqui turã mose Dios rese, siqui turã nda nyue cote. <sup>17</sup>Cristo que mano mbia mingo turã sacua Dios rese ra. Tu que mbia mbiirandu ja nonde nyiese ra. Judíos. Judíos eã abe mbiirandu nonde nyiese. <sup>18</sup>Cristo que mano nande ja je ra. Judíos je. Judíos eã je abe no. Nyebe Espiritu Turã miĩ nandemingo ja nguiã nyiese ã. Dios nandesihchã ja arõte qui a ã cote. <sup>19</sup>Mbiamo eã ño jë Dios je cote re. Ā jëingo isho eãte Dios si ã cote. Dios riirĩ tuchi chõ jë cote re. Cristo resenda ataque rã sí chõ jëingo nguiã ã cote. <sup>20</sup>Tuchua raã ji mo na ndei jë. Jesús chimbaaquiatu rei tuchia i rã. Dios cheë mbuchecuaa cose ndare abe rei tuchia a i rã no. Jesucristo rei ũquĩ i tuchi. <sup>21</sup>Nande Jesús icua mose, Dios chuchua turã naanguia chõ nandeico nguiã Jesús je ã. Nande Jesús quiato tubiriã i ite riqui ã. <sup>22</sup>Espiritu Turã ño jemingo nguiã Dios rese jë abe ũquĩ. Nyebe jë abe jëingo Dios chucharã ũquĩ. Dios riqui jeñiangui re ũquĩ.

### Judíos eã abe ra siqui Dios rese, i Pablo

**3** <sup>1</sup>Se rei Pablo. Jesucristo rimba. A setarõ ji ñi jeniã a. Jẽ judíos eã nii. —Judíos eã abe riqui Dios rimba ã, ae beite que se quia jeniã nda. Nyebe setarõ ji ñi nguiã a. <sup>2</sup>—Judíos eã je chõ seturã esenei senei nde, i que Dios seje ra. Ûquĩ ndese beite aico co. Jẽirandu equia serese reae. <sup>3</sup>—Judíos eã abe ra siqui serese. Secheẽ turã esenei senei ee, i tuchi que Dios sembaaquiatu ra. Ûquĩ ngue asenei jua chõ jẽje ra, se embesa mose jẽje nyii. <sup>4</sup>Sechimbesa rese jemaẽ mose ra jeñee cote. —Pablo Dios cheẽ icua tuchi chõ nguia judíos eã nii nde, jenyẽ ra cote. <sup>5</sup>—Judíos eã abe ra siqui serese judíos rã si tuchi, i eã ngue Dios mbia mo je cose ra. Namõ ño mbia jirandu nguiã ùquĩ ndese. Namõ ño Espiritu Turã Jesús chimbbaaquiatu mbiirandu nguiã ùquĩ ndese. Dios cheẽ mbuchecua abe mbiirandu ùquĩ ndese. <sup>6</sup>Ã ndei Dios cheẽ mbuchecua ramo ji ã: Judíos eã abe ra siqui Dios rese judíos rã si tuchi cote. Mbia rete miã na nda eriqui ja cote. —Mbae turã tasaã jẽje Jesucristo riã, i mose Dios, judíos achõ je eã ño eriqui nguiã ñee. Judíos eã abe je chõ ñene.

<sup>7</sup>—Ûquĩ secheẽ esenei senei mbei quia mbia je, i que Dios seje ra. Mbae turã mo asaã eã ndaque Dios je nyii. Uquirãcuã abe que emee seje ùquĩ naa sacua nda. <sup>8</sup>Dios turã tuchite que seje ra. Se mbae raande rocoĩ ee nyii. Nyebe ñee nguiã seje. —Secheẽ esenei senei mbei quia judíos eã je. Ae rese mbia riqui jiranuate Cristo turã nae, ùquĩ esenei senei judíos eã je, i que seje ra. <sup>9</sup>—Ae turã nda asaã judíos eã je nae, ùquĩ ndese mbia embiirandu ja cote, i que Dios seje ra. Dios quiarei ndua ndua ùquĩ nyii. Mbae ao ja nonde nyii. <sup>10</sup>Mbaerã ño Dios mbia mbiirandu ùquĩ ndese cote chã. Mbia jirandu sacua Dios aquiatu rese chõ ñene. Dios judíos eã mingo turã mose judíos rese, mbia ra nyuruira tuchi mae Dios quirãcuã ndese. Ibatenda abe ra nyuruira tuchi mae erese no. <sup>11</sup>Dios ndua ndua ùquĩ nyii. —Mbia chumumbarate riqui raque ã. Emo emo nda ambucha nyiese Cristo mano mose, i que Dios cose ra. Ûquĩ ngue esaã Jesucristo riã cote ra. <sup>12</sup>Nandeico Jesucristo icuate ã cote. Nyebe nandeico nguiã siquicheãte ñee Dios je ã cote. <sup>13</sup>Ae mbae rasi asaã nguia cárcel co nae, jeniã ño ñene. Seyate se mbae rasi raã mose jeniã. Jẽ abe jeñimbã chõ nguia serese.

### Cristo nyesecua tuchi uquiato rese

<sup>14</sup>Judíos eã abe chõ Dios mingo nguiã uchiẽse. Nyebe aico nguiã gracias i bei Dios je co. <sup>15</sup>Ã nandechumumbarate riqui íbii ã nae, ùquĩ ndu ja chõ Dios re. Ibatenda abe ru chõ ae no nde. <sup>16</sup>Dios mbae saã ja arõte nande je. Ebite mbae raã mose nande je. Nyebe aico nguiã ñee ee jeniã a. —Paba, Espiritu Turã emondo tuchi echiangui re. Embuquirãcuã sacua, ae chõ nguiã ee a. <sup>17</sup>—Paba, sã Cristo riqui tuchi echiangui re. Sã Cristo icua tuchi. Sã eriqui nyesecua tuchi Cristo rese, ae beite se quia

Dios je jeni co. <sup>18-19</sup>Mbaerã ño Dios riqui nyesequa tuchite nanderese co. Co eriqui nyesequa tuchite nande rese co. Jendua tuchi quiatu quia ùquĩ ndese. Sã Cristo quiato riqui ndua ja ùquĩ ndese. Sã Dios riqui tuchi jeñiangui re. <sup>20</sup>Dios quirãcuã ndiqui beite nandechiangui re co. Nandembirãcuã mbeite equia co. Nyebe eriqui mbae raã ja arõte nande je co. Ae rese nandeico ndua eãte nae, ùquĩ abe chee esaã arõte quia nande je co. <sup>21</sup>Sã Jesucristo quiato riqui ñee turã mbei Dios je Jesucristo riĩ. Mbae ua ja mose chee. Eĩ si ra equiatio quia ñee turã mbei eriĩ. Amén.

### Hue rĩ ja chõ Espíritu Turã ndiqui nguiã Jesús quiato mundua

**4** <sup>1</sup>Setarõ ji aĩ Jesús riĩ a. Secheẽ amondo quia jẽje aque. Jẽingo turã ño nguia Cristo rã si. Dios chiirabote quia jẽ nde. <sup>2</sup>Jẽseteã ño jẽingo. Jẽingo tochi chõ nguia. Jendoseĩ nguiatu chõ nguia jenyue. Jenyesequa chõ nguia jenyiese. <sup>3</sup>—Hue rĩ ja chõ nandeico ndua jẽ, jenyẽ chõ nguia jenyue. Sã Espíritu Turã ndiqui jemundua hue rĩ ja. <sup>4</sup>Jesús rete miĩ na ño nande re. Espíritu Turã miĩ ño siqui nguiã nandechiangui re co no. Jesús miĩ na nda nande ja nandeico. <sup>5</sup>Ae miĩ ño nandererequa ja re. Ae miĩ ndese chõ nandeico ja nguiã ã. Aque miĩ nii ño ngue bautizar i nguiã nande je no. <sup>6</sup>Dios miĩ ño nanderu ja re. Ae miĩ ño nandemingo nguiã mbae rese. Ae miĩ ño siqui nguiã nandeite re co no. <sup>7</sup>Dios que nandechisaã ae aerã mee nande je ra. Cristo que uturã mee mee nande je ra. Ae ra nandesaã saã, ùquĩ naa naa turã sacua. <sup>8</sup>Sã embesa ji riqui ñee no:

Cristo que nyui oso ibate ra.

Mbia tarõ ji que equerao ra.

Mbia chisaã ae aerã ngue emee mee mbia je ra,

i que embesa ji ra. <sup>9</sup>Jesús que siqui ibátee nyii ra. Aquere que eru nguichi íbii cote ra. <sup>10</sup>Ae sí que oso nyui ibei robei cote ra. Mbae rerecuarã ja sacua ngue ae cote ra. <sup>11</sup>Ae que mbia chisaã ae aerã mee ee ra. — Apóstoles ra jẽ, i que emo emo je ra. —Secheẽ embuchecua chequa quia mbia je, i que emo emo je ra. —Mbia sequiatioã je secheẽ turã esenei senei mbei seriĩ, i que emo emo je ra. —Mbia serimba etequiatio beĩ, i que emo emo je ra. —Mbia embaaquiatio quiatio beĩ quia, i que emo emo je no nda. <sup>12</sup>Eĩ ngue Dios uquiatio mbaaracua racua ja uchisaã ae aerã ndese ra. Ùquĩ mose ra Jesús quiato Jesús oseĩ i i tuchi cote. <sup>13</sup>Ùquĩ mose ra nandendua ja Jesucristo rese hue rĩ ja. Ùquĩ mose ra Jesucristo nandeicua i i tuchi. Jesucristo rã nda nandeico chee ùquĩ mose. <sup>14</sup>Ùquĩ mose ra nandeico ñimbirãcuã tuchi Cristo rese. “Tambĩĩrĩ irĩ Cristo riĩ” i mose emo nande je, nandeicoã nda ùquĩ ndese. Nandendua ata ata eã nda Cristo riĩ. Ae miĩ ndese chõ nda nandeico beĩ. Mbia riiĩ na nda nandeico ndua ata ata eã. <sup>15</sup>Ùquĩ mose ra nandechẽẽ ñooño eã. Mbia ra nandembĩĩrĩ iriã. Nandechesequa ja ra equia mbia rese. Cristo rã si chõ

nda nandeico turã. Dios quiato rerecua tuchite quia ae re. Sã nandeãquĩ nanderete rerecua no. <sup>16</sup>Sã nanderete riqui ñimbirãcuã ja no. Eĩ si chõ Cristo rimba nguiã ñimbirãcuã ja siqui turã nyiese. Sã nanderete no. Nanderete resenda siqui turã ja mose, nanderete rasiã ja rae.

**Ae icuã jësaã saã nguia nyii nae, ùquĩ jësaã saã eãte quia namo ã**

<sup>17</sup>Jesús cheẽ tuchi chõ ã nde: Dios icuasa reã na nda jëingochĩ cote jë. Ndua choño ño nguiã mbae rese ùquĩ. <sup>18</sup>Eãquĩ ãtã ño ùquĩ nde. Dios cheẽ andu sereã nea je chõ ùquĩ nde. Nyebe Dios riqui nguiã nguico mee eã tuchi ùquĩ je. <sup>19</sup>Mbae icuã achõ ndese chõ eriqui nguiã ndua ndua. Eireĩ nguiãte mbae icuã naa naa mose cote. Oo oo tuchi mbae icuã ja rese. <sup>20</sup>Ùquĩ ngue Cristo jembaaquiatu quiatu eã jë nda. <sup>21</sup>Jëirandu que Jesús rese resẽ. Ae sí chõ ngue jembaaquiatu resẽ. Jembaaquiatu que ucheẽ turã nii nda. <sup>22</sup>Jeñiangui renda icuã si jëhui chõ. Aba mbiicuãsa tuchi chõ ùquĩ nde. Aba mbiĩrĩ irĩ ño ùquĩ nde. <sup>23</sup>Jendua ndua jembiasu chõ ae. Ae rese jëingo ndua icuã icuã nyii nae, ùquĩ si jëtesarei chõ cote ae. <sup>24</sup>Jeñimbiasu chõ nguia ae. Ùquĩ mose ra jëingo Dios rã si. Jëingo turã tuchi ra equia ee.

<sup>25</sup>Jeñee ñoño eã ná nguia jendesenda mo je cote ae. Nyiesenda ja chõ nande cote re. <sup>26</sup>Jë paama i mose, paama jenyeturã ño nguia. Paama jenyecoã ño nguia. Tenda oso nonde ti jenyeco. <sup>27</sup>Jë paama i oco mose, diablo ra jembicuãte cote. <sup>28</sup>Ae mbae mbuquiachã quiachã nguia nae, sã mbae mbuquiachã eã cote. Sã ae ae mbae ao ao o je icua cote. Sã eriqui mbae mondo mondo mbaecha reã je cote. <sup>29</sup>Jenyuru jendecochõ ño nguia ñee ndocoĩ mbae icuã nii jë. Mbae turã nii ño jëingo ñee mbia je jë. Emundua ndua sacua Dios rese. <sup>30</sup>Espíritu Turã nda jembia eã eãchĩ jë jë. Ae chõ ngue Cristo mbae marca miĩ nguiã jendese. Nyebe jëingo nguiã ñee. —Cristo ra nandembiasu erã si, i. <sup>31</sup>Paama jenyechĩ nda emo nii. —Ĩãchĩ se, jenyechĩ nda emo nii jë. Jëtasẽ tasẽchĩ nda emo je. Jeñee icuã icuãchĩ nda emo nii. <sup>32</sup>Jëturã ño jëingo jenyue. Jëseteã ño jëingo jenyue. Jendesenda icuã icuã mose jëje, jëtesarei chõ eicuã si. Sã Dios jëicuã mbutiã jë Cristo riĩ nyii no.

**Dios quiato siqui bei mbae turã ndese**

**5** <sup>1</sup>Dios riirĩ tuchi chõ jëingo nguiã ã. Nyesecua tuchi equia jendese co. Erã si chõ jëingo. <sup>2</sup>Jenyesequa tuchi quia mbia rese. Sã Cristo riqui nyesecua tuchite nanderese no. Sã mano nandeicuã ndiquicharõ oveja rã no. Emano mose que Dios ia tuchi erese ra.

<sup>3</sup>Cristo mbae chõ jë cote re. Nyebe jëingo eã emo ninisi rese. Eruã mo ndese abe no. Emo mbae ra jenyosei choseichĩ. Eicuãte ùquĩ. <sup>4</sup>Jenyuru jendecochõ ño nguia ñee ndocoĩ mbae icuã nii. Mbae icuã aba ireingua riĩ jeñee eã. Eicuãte ñee mose ùquĩ. Gracias jenyeco quiatu quia Dios je.

<sup>5</sup>Emo siqui mose ngūinisiã ndese, aque ra siqui eã Cristo rese, Cristo siqui mose ererecua. Ae mbae icuã saã saã mbeite quia nae. Ae emo mbae chosei chosei quia nae, ũquĩ abe ra siqui eã Cristo rese. Emo mbae osei osei mose, Dios abareã ndese siqui raanguia chõ ũquĩ no nde. <sup>6</sup>Ae ũquĩ saã saã nguia mbae icuã nae, ũquĩ je ra Dios mbae rasi raanguquia tuchi. “Ichõĩño ñene” ichĩ nda emo jembĩĩrĩ irĩ jẽ. <sup>7</sup>Ae ũquĩ saã saã nguia mbae icuã nae, ũquĩ ndese ra jẽingochĩ jẽ. <sup>8</sup>Itondaruqui re rã ngue jẽingo cose ra. Nyaáshii ño jẽingo nguia Jesús rese ã cote. Nyebe jẽingo turã. <sup>9</sup>Ae siqui nyaáshii nae, ũquĩ siqui turã ño nguia ã. Ñee ñooño eã ño nguia emo je ã. Siqui ãte equia mbae icuã mo ndese ã. <sup>10</sup>Ae Dios bite riqui nae, ũquĩ ndese chõ jẽingo ñimbaaquiato quiato. <sup>11</sup>Ae itondaruqui riinda saã saã nguia mbae icuã nae, ũquĩ nda jẽsaã saachĩ erese jẽ. Echiao icuã ñi ño jeñee ee emundua jẽ. <sup>12</sup>Ae ũquĩ saã nyecuayã cuayã nguia mbae icuã nae, aba ireite ñee ũquĩ ñi. <sup>13</sup>Jẽ ũquĩ nyiao icuã mbuchecua mose ee, ndua ndua ra erese cote. Emo emo siqui arõte Cristo rese cote. Itondaruqui riinda recha mbae icuã. <sup>14</sup>Sã embesa ji riqui ñee no:

Ae uque saã saã nguia nae, sã ũquĩ ñumumba.

Ae siqui quia eraaque rã nae, sã ũquĩ quera si.

Ũquĩ mose ra Cristo uturã ndeacuquia ee,

ĩ que embesa ji ra.

<sup>15</sup>Cochee tuchi chõ jẽingo Dios rese. Mbia aquiatuã na nda jẽingochĩ. Mbia aquiato rã nguia jẽingo. <sup>16</sup>Ae Dios bite riqui nae, ũquĩ ndese chõ jẽingo ñimbecoteã. Mbae icuã icuãte eriqui ã cote. <sup>17</sup>Jẽaquiatuã eã ño jẽingo Dios rese. Ae Dios bite riqui nae, ũquĩ ndese chõ jẽingo ñimbaaquiato quiato. <sup>18</sup>Jẽquiagua quiacuachĩ nda equia jẽ. Jẽquiagua mose mbae icuã jẽsaã saã ja arondete. Espiritu Turã nguia jemingo tuchi jeñiangui re. <sup>19</sup>Cristo riĩ jeñee turã tuchi quiato quia jenyue. Jẽirasei rasei tuchi quiato quia Dios je. Himnos. Salmos. Jẽya chõ jẽingo irasei rasei Dios je. <sup>20</sup>Dios rei nanderu. Ae chõ mbae ja mee mee nguia nande je co. Nyebe “gracias” jenyee bei quiato quia ee Jesucristo riĩ.

### **Jẽingo turã ja chõ nguia jenyuchua jenda ja je**

<sup>21</sup>Jenongue cheẽ jemumbayã ño nguia. Cristobi tuchi chõ ũquĩ nde. <sup>22</sup>Sã cuña ngu cheẽ mumbayã. Sã eriqui Dios cheẽ mumbayãte no. <sup>23</sup>Eru quia rei ngūinisi rerecua. Sã Cristo uquiato rerecua no. Cristo quiato rei Cristo rete rã. Cristo quiato ngue esirõ nguia eicuã si. <sup>24</sup>Sã Cristo quiato riqui echeẽ mumbayãte no. Eĩ si chõ cuña nguia ngu cheẽ mumbayã mbei. <sup>25</sup>Sã eru riqui nyesequa tuchi ngūinisi rese. Sã Cristo nyesequa tuchi uquiato rese no. Sã mano nyee eriquicharõ no. <sup>26</sup>Uquiato no sacuã icúe chõ ũquĩ nde. Irei que i je ra. Ucheẽ je abe que eirei no nda. <sup>27</sup>Cristo uquiato mbuturã turã ja quia co. Mbae icuã ndese emingo uquia reãte. Nyebe eyate riqui nguia erese co. <sup>28</sup>Sã Cristo riqui nyesequa tuchi uquiato

rese no. Eĩ si chõ mbia quia nyesecua ngũinisi rese. Sã emo ndiqui ngueteãte nguete rese no. Emo ngueteã mose ngũinisi rese, nguete rese ngueteã naanguia chõ ũquĩ nde. <sup>29</sup>Emo nda nguete ucuayã eã. Nguete ra equereco turã. Teaquiato turã nda equia. Eĩ si Cristo quia uquiato rerequia turã co no. <sup>30</sup>Cristo rete rã si chõ equiato re. Nande abe chõ Cristo rete rã no nde. <sup>31</sup>Dios que ñee nyii ra. Emo ngũinisirã ndea mose, sã nyao usi si. Ngu si abe no. Sã ngũinisi mii ndese chõ eriqui. Co mii siqui rã ño eriqui nguiã nyiese cote. <sup>32</sup>Mbaranguiatuãte raque ũquĩ icua. Nyeremo siqui mose co mii na. Cristo riĩ ño eriqui nguiã ñee. Equiato riĩ abe no. <sup>33</sup>Jêje abe chõ eriqui nguiã ñee. Jẽ nyesecua tuchi sacua jeninisi rese. Sã jẽingo nyesecuate jendete rese no. Sã cuña abe riqui ngu cheẽ mumbayã mbei.

**6** <sup>1</sup>Mbia riiri, jendu cheẽ jemumbayã ño nguia. Jësi cheẽ abe. <sup>2-3</sup>Ãngue Dios ñee cose ra: “Jẽingo turã ño nguia jësi je jẽ. Jendu je abe. Jẽingo turã mbei ra equia ũquĩ mose. Jendeco ra jẽingo arete íbii,” i que Dios mbia je cose ra. <sup>4</sup>Eru je tacheẽ cote. Esi abe je. Jeñee icuã icuã tuchite chĩ nda jendiiri je jẽ. Paama i chee ra jêje. Jembaaquiato turã turã quiato quia. Jẽingo turã quiato quia Dios rese.

<sup>5</sup>Mbia rimba je tacheẽ cote. Jenderecua cheẽ jemumbayã ño nguia. Cochee chõ jẽingo ee. Jẽingo turã ño nguia jenderecua je. Cristo bite ũquĩ. <sup>6</sup>Jenderecua mae eã mose jendese, ũquĩ mose abe chõ jẽingo embae raã naa turã ee. Mbae jësaã turã ja quiato quia Dios cheẽ ndui si. Cristo rimbate quia jẽ nde. <sup>7</sup>Jëya chõ jẽingo mbae raã naa mose jenderecua je. Dios je chõ jẽingo nguiã eraã ũquĩ. Jenderecua ibi jenda mii je eã ño ñene. <sup>8</sup>Dios ra mbae turã mee jêje emo mose jenyiao turã ndibishorõ. Jẽingo mose mbia rimba. Mbia rimba eã jẽingo mose ra re no ae. <sup>9</sup>Mbia rerecua je tacheẽ cote. Jẽingo turã ño nguia jẽ abe jenimba je. —Tareiruã nua, jenyechĩ nda embiiri irĩ jẽ. Jẽ abe chõ jenderecua no nde. Jesucristo rei jenderecua. Jenimba abe rerecua. Eĩ ja chõ mbia Dios je re. Mbia mii ndese ra eriqui turã eã.

#### Soldados rã si chõ jẽingo nyiquisã mbae icuã si

<sup>10</sup>Hui bei nonde ã tacheẽ jêje. Dios quia rei equirãcuã tuchi. Dios quirãcuã je chõ jẽingo nguiã ñimbirãcuã. <sup>11</sup>Sã soldado riqui armadura mingue no. ũquĩ ndei nyiquisã sacua ũquĩ. Eĩ jenyje si chõ nguia siqui tuchi Dios rese nyiquisã Satanás si. <sup>12</sup>Ae icuã icuã ndiqui nande je Jesús riĩ nae, mbia eã ño ũquĩ nde. Satanás ño ũquĩ nde. Satanás nimba abe no. Aba checuayã icuã abe no. Mbae icuã nderecua ja chõ ũquĩ nde. Equirãcuã tuchi riqui ũquĩ. <sup>13</sup>Jẽingo tuchi Dios rese ũquĩ icuã si nyiquisã sacua. Jẽquirãcuã jẽingo tuchi sacua. Jẽquirãcuã mbei quia jẽingo, Satanás jembiiacuã eã sacua. <sup>14-17</sup>Jẽquirãcuã tuchi chõ jẽingo. Sã soldado riqui icoquiato armadura mingue no. Eĩ jenyje si chõ nguia icoquiato

diablo jembiiacuã eã sacuã. Sã soldado riqui ngũmbi cuasa mingue no. Huiisia riinda abe mingue nyiquisã sacuã no. Sã soldado riqui huiyao mingue icoquiato no. Sã escudo abe rerequia oo no. Nyiquisã sacuã emo uu mombo mose ee. Sã huiite sucha ãtã abe mingue uãquĩ ndiquisã sacuã no. Sã tiquise abe rerequia no. Soldado rã si chõ jẽingo icoquiato nyiquisã sacuã diablo si. Jeñee ñoño eã ño nguia. Jẽingo turã mbei chõ nguia. Jẽingoquiato bei quia Dios cheẽ turã nenei nenei mbia je. Dios jẽicua tuchi quiato quia. Dios icua tuchi mose ra diablo tã i eã jẽje. Dios quirãcuã ndese quia jẽingo tuchi mbae icuã naa eã sacuã. Dios cheẽ jẽicua tuchi quiato quia. Ũquĩ mose ra Espiritu Turã siqui tuchi jendese. <sup>18</sup>Jeñee mbei quiato quia Dios je. Sã Espiritu Turã jembucheẽ turã mbei quia ee. —Mbae embu seje. ã embu seje, jenyee bei quiato quia Dios je. Dios quiato ja riĩ ño jẽingo ñee Dios je. Dios siqui turã sacuã erese. <sup>19</sup>Seriĩ abe quia jẽingo ñee mbei Dios je. Sembucheẽ turã sacuã, se echeẽ nenei nenei mose mbia je. Ae rese mbia riqui jiranuate Cristo riĩ nae, ũquĩ asenei senei nguia mbia je co. <sup>20</sup>Dios que semondo ucheẽ turã nenei nenei sacuã nda. Ũquĩ nii ño setarõ ji aĩ nguia a. Jeñee mbei quiato quia Dios je seriĩ. Se ireĩ ireĩ eã sacuã. Se echeẽ turã nenei nenei mbei sacuã mbia je.

#### Pablo ñee hui bei

<sup>21</sup>Tíquico si quia jendea aque. Ae ra mbae senei ja jẽje jembiiirandu seriĩ. Ae que mbae saã turã mbeite quia serese ra. Dios rimba turã tuchi chõ ae re. <sup>22</sup>Nyebe amondo nguia jendea aque. Jembiiirandu ja sacuã urerese. Jembia tuchi sacuã Cristo rese abe. <sup>23</sup>Jesús quiato chõ jẽ abe, se rã si re. Sã Paba ibatenda riqui jembia bei tuchi. Sã eriqui jembuchesequa tuchi mbia rese. Sã Jesucristo icua uquia tuchi jẽje. <sup>24</sup>Ae nyesequa tuchi quia Jesucristo rese nae, sã Dios turã siqui tuchi ũquĩ ndese. Amén.